


建德縣志



漢	九	書
一〇	〇	門
八	八	
六	六	
四	四	
二	二	
冊	冊	
架	架	
函	函	
號	號	
類	類	

內	閣	文	庫
漢	九	〇	八
書	六	五	九
類	號	冊	架

內閣文庫	
番號	漢 9086
冊數	5 (4)
函號	292 45



建德縣志卷之六

人物志

建德縣志卷之六

嚴隄古郡見於史者或稱睦或稱嚴或稱建德地
方千里邑領數城地大物衆載籍所傳不勝攬焉
若分州而縣建德土疆不出百里之外以是求之
人物自唐以前闕有間矣聿稽前哲斷自宋始於
是有若江民表喻子才之流開其先嗣此而還山
川秀靈之氣毓爲人文接踵代興比肩林立亦萃
盛哉古稱不朽厥有三立並足珍也作人物志

鄉達

達之爲義於國爲楨於民爲望宿稱三達今古
同尊雖德有大小而名不區分均足增竹素之
光作邦人之表也志鄉達

宋汪公望字民表崇寧初任左司諫抗疏極論時政
及宮禁事皆人所難言者時陳佑曾布罷去公
望入對曰陛下臨御以來易三言官逐十諫臣
非天下所願望也夫諫臣養之不可不素用之
不可不審聽之不可不察去之不可不慎時以
爲吝言復疏劾蔡京坐貶安南軍天下高之紹
興元年詔贈諫議大夫

哭官其後二人弟公著公

佐前後皆登進士

徐瑒字文之紹定三年通判袁州歲當大歉瑒首
發廩賑恤全活甚衆貧給鏹病給藥歿給棺收
養嬰孩至踰百數民深德之時版曹以宜春產
絹委市絹萬疋瑒力控免竟寢前命擢守建昌
邦人咸惜其去

馬大同字會叔登紹興二十四年進士甫進卽以
剛介聞改國子監簿入對便殿上與語輒奏不
然明日謂宰執曰夜來馬大同奏對朕與之辯
論凡不然朕說者三氣節可嘉由是有大用意

每奏輒陳恢復大計歷中外要官必求盡職所至雖童稚亦知其名任至戶部侍郎學者稱為鶴山先生

王昇字君儀博洽多聞尤邃禮易初家居不仕以尚書左丞山陰陸佃薦特起于家遂歷禮官晚以徽猷閣待制還鄉里知數預語人以將終紹興二年無疾而卒

王古字敏仲自貳卿出守會稽成都紹聖四年謫守宜春天性慈仁政舉綱領少閑則靜坐誦書而已

明唐宗魯洪武四年由通經秀才授工部侍郎以疾乞歸既而疾痊赴京左遷會州府麻龍縣丞卒于官

魯謙字文讓洪武二十三年由人材授刑部員外郎累官至福建左叅議宣德二年賜誥有踐更多任克舉厥職之褒進階朝議大夫卒于官

林貢字浚仲洪武二十八年由儒士為蘇州府推官歷大理寺評事寺副寺正陞開封府知府居官廉能所至稱之改任交趾卒于官兄貫洪武間以明經為本縣儒學訓導

項伯英由郡貢生中洪武三十二年應天鄉試授
池州府建德縣教諭施教有方多所造就歷陞
工部給事中

孫瓊字萬芳由洪武三十一年郡貢生授景陵
知縣持身廉介不為威奪利誘綽有能聲永
三年蘇松洪水壞民田廬上命吏部選天下廉
能令督理凡十有八人瓊與焉脩築圩岸疏決
壅滯成底成績事竣陞工部主事以老疾乞致
仕囊篋蕭然無以為家至今稱之

卽慶字士正幼明敏好學登永樂二年進士有明

邑庠登進士科者自慶始授戶部給事中參駁
唯允秩滿陞河南按察司僉事卒于官

烏濬字士哲登永樂二年進士授禮科給事中剛
介敢言有聲朝宇卒于官

陳禮字以敬中永樂六年應天鄉試授監察御史
有能聲陞河南按察使洪熙元年賜誥有寬厚
和平有為有守之褒進階通議大夫改廣東按
察使致仕卒

張瑄字宣甫山永樂四年楷書選貢授邳州州同
有惠政陞太平府通判公廉不苛吏民懷之致

仕歸子忠字顯之成化間由太學生授汀州府
通判在任有循聲

徐述字好古永樂中由稽勲司主事擢守漢陽首
新學校勸課農桑創建譙樓脩葺塘壩政教大
行時值朝廷採大木設法完解民若弗與歲歉
民艱于租諭關市得穀數十萬代民輸足時有
虎傷人爲文禱神虎卒就捕其害遂息人以神
明太守稱之公明有守吏民懷服丁外艱民弗
忍其去旣去思之如失父母後歷官至福建鹽運
使致仕吏部以其治最上賜勅進中議大夫贊

治尹

阮士進字志學由永樂二十一年舉人授羽林前
衛經歷陞貴池知縣律已甚嚴而御下以寬均
徭省賦興學勸農甚得民譽以母老乞歸養卒
子家子紹成化三年貢任泉州府經歷孫浩正
德七年貢任上高知縣曾孫珩隆慶六年貢任
平陽訓導文名爲世重云

汪賢由永樂十七年貢入太學授館陶縣知縣在
任公廉吏民悅服卒于官

傅宗字本源由宣德四年舉人授貴池縣訓導遷

國子助教擢翰林院檢討兼右春坊右司諫景泰四年賜勅有謙恭和厚勤慎周詳之褒天順元年陞雲南右叅議丁內外艱改四川提督松潘等處邊儲右叅議卒于官歷官三十年無銖積以遺子孫家舊田廬悉讓諸弟所餘惟文藁而已子能孫咨皆貢授教職克繼先志世有清白聲

柳勝華字景芳由正統歲貢景泰中授澧州知州居官廉潔吏治精明時藩邸初封軍校橫甚勝華飭躬正色一繩以法民始獲安澧在荆岳嘗

武之間軍民土田疆界錯雜乃經制未定醫言實繁勝華履畝清覈至今版圖較若列眉尤加意教化作興士類脩學校建號舍課文勵行士林誦焉在任九載治行爲諸郡最秩滿當陞去闔郡饋留天順五年卒于官民哀之請諸當道祀名宦祠所著詩文盈帙治家嚴肅子孫彬彬多繼武云

柴文顯少攻舉業尤精於中庸號柴中庸登正統十年進士授監察御史巡按福建激濁揚清一遭畏服凜然有攬轡埋輪之風以艱歸有巨瑞

者惡其與己不合因聞寇竊發羅織其罪論死天下冤之父勝永樂間以耆宿直言民困朝廷爲蠲其賦役者三年合境佩德內翰泰和陳循表其墓

胡叔英由正統十一年貢入太學授河南新鄭知縣在任多善政公廉有爲吏民敬而愛之以老疾致仕歸卒

林茂字仲榮由正統十四年貢入太學授新建知縣當道廉其才委督運以給軍發廩以賑饑皆著聲致仕卒年八十

滕志學字希賢由景泰元年舉人授潼川知州先是州學傾圮志學撤而新之士風丕振登第者相繼焉以內艱歸卒于家

阮孟昇由景泰元年貢入太學授奉節知縣以艱歸後除雲陽縣所至皆有善政致仕卒

徐懷字明德登天順四年進士歷刑部主事員外郎遷江西按察司僉事歷陞江西右布政使轉左入爲都察院右副都御史奉勅整飭薊州山海等處邊備并巡撫順天地方陞南京刑部右侍郎宏治六年卒于官遣官祭塋廕子璋入監

後授無極知縣懷爲人耿介米蕪自持居官勤慎所至洗冤澤民人咸德之歷任三十餘年無錙銖之積清白之操無愧古人崇祀鄉賢嘉靖間提學劉俊文徹爲之立祠命其孫鋈奉祀事

林鴻字時初篤志好學克天順二年貢授甌寧知縣丁內艱服闋補連江邑民邊海不知藝黍鴻教以播種之法始獲其利歲旱禱雨其霖隨澍民爲建井雨亭致仕卒

陳廷忠克天順七年貢授南安知縣廉公有爲政聲甚著卒于官

方謙字克和由天順年貢入太學授霑化知縣先是連年水旱逃亡者衆謙撫字有方民多復業時有一粟雙穗一蒂雙瓜之瑞人皆以爲德政所感年五十致政歸

陳經字載道由天順年貢入太學授漳州府推官律已公廉處事詳審漳俗好訟經所訊鞫人自以爲無冤在任七年致仕歸卒於家

邵廷貢由天順年貢入太學授蘇州同知悉心民隱政績可紀贈父如其官陞兗州府通判致仕

歸卒

邵仕鵬由天順年貢入太學授兗州府推官清廉有爲鞫獄明允當道薦以老疾辭歸卒

陳思禮由天順年貢入太學授南城知縣蒞政嚴明事辦而民不擾改知信豐治亦如之未幾緣事歸人皆惜之

鄧滋字德潤登成化丁未進士陳情終養居喪如禮服闋授南京吏科給事中劾去李廣王振等不憚權貴嘗上防邊五事及天變脩省五事又奏罷寶船式樣劾去貪污官吏人多忌之出爲

惠州知府善政卓然民謠載道未老乞休子之曰良曰佐成授教諭能世其家云

楊達字文達成化中由太學生授宿州同知特歲歉奏減賦稅民困以甦提督兌運軍士悅服在任六年致仕歸

何渥起門之後家世雍睦有義行渥聰明孝友飭躬恂如登宏治壬戌進士授高要縣知縣清廉愛民不爲私蓄士論重之

王浚字德深登正德戊辰進士任薊州知州抑制太監劉瑾家僕取怨下錦衣獄尋釋陞刑部員

外以諫阻南巡廷杖瀕死陞山東沂州兵備僉事晉貴州副使時苗民吳尙賢肇亂浚往平之累陞河南左布政使入爲順天府尹與接治者不協左遷福建叅政尋陞右副都御史提督南贛軍務輯寧師旅節省錢糧歲以萬計陞南京刑部侍郎又一年改北部因九廟災自陳致仕年七十二卒於家欽賜祭葬子用宣仕至長史俞夔字舜臣由正德丁丑進士授安福知縣會宸濠亂奏免朝覲多保障功劄鳳林浮橋歲免漂溺擢長沙府同知勦劇盜彭思昶等三千餘

降勅獎資陞四川安綿兵備僉事會歲饑請發內帑官銀二萬餘兩賑濟劔巴等十一州縣全活甚衆番寇玻柘等糾結神溪諸番入寇邊將許仁等敗績死之夔出奇擒番酋千萬山等三十七人復古維州侵地千餘頃築平番赤土二堡捷聞陞本司副使兵備建昌建故土番羣居無有躬至徼外者夔深入不毛番人驚愕失氣塩井土官刺馬仁等相仇殺悉討平之尋以外艱歸補江西南贛兵備擒僞巡方一十三人上嘉之陞按察使歷本省左右布政使卒於家有

六詔紀聞及揚芬錄長子名獻以太學生授絳州判官

魯承恩字光世由正德己卯舉人授和州知州咨詢民隱均平徭役適江洋巨盜爲害率民兵悉擒之陞涿州同知尋陞都勻知府時征麻陽寇檄督軍餉卒於辰州督府賻輓以歸所著有陽和稿需餉稿睦族等集

鄧椿字德邵由正德己卯舉人授武進教諭兩省聘主鄉試丁內艱服闋補南樂行取部選注御史尋改寧國府同知當道交薦秩滿陞黎正知

府彞民懷惠未幾致仕歸著有仰高錄行于世
俞稷字舜牧夔弟也昆季五人皆有才名閭里有荀龍之目稷尤英敏由嘉靖癸未進士授新淦令有奇績擢山西道御史尋改河南道前後章奏皆切時政直聲震一時未幾解組歸著有西臺奏議

陳瑋字良用與同邑俞淳從蘭谿章楓山先生遊瑋以嘉靖壬午舉人授長泰知縣有聲擢刑部主事淳克嘉靖三十五年貢任博羅番陽教諭今祀博羅名宦

柳鳳梧字子高本泰第四子克隆慶戊辰恩貢中
癸酉應天鄉試初爲松滋令以艱歸補弋陽縣
地當孔道銳意節省竟以忤當道坐謫補廣東
鹽課提舉乃條議通商惠民數事地方賴之尋
轉善化令未任卒

鄧美政字少溟登萬歷丙戌進士授承天府推官
矜疑得情獄無冤滯戊子辛卯兩爲本省同考
時監臨慮有遺珠命政搜閱春秋遺卷得李長
庚文遂拔之後李名位最顯擢大理評事轉兵
部郎遷漳南道調荆西道所在有政聲陞苑馬

寺正卿致仕歸雙親尙在咸稱慶焉

蔡應龍字豫南才氣超羣幼隨父客豫省入籍爲
開封諸生會科試冠軍人士羣起攻之遂遣歸
中萬歷戊子本省鄉試第一任撫州府推官改
石阡府以清慎自矢嘗署其門日照來明月一
懷贏得清風滿袖以憂歸不復仕卒年七十九
陳道字霽宇性敦恪事繼母以孝聞撫幼弟不欲
分箸盡以腴田歸之克萬歷癸巳貢授廣西遷
江知縣邑好訟道以誠意感孚民消罔詐縣界
邊徼徭民雜處有豪徭陸轉者殺傷差胥諸司

欲勦之道執不可乃單騎入陸村諭以順逆擒
陸轉一人寘之法而數萬生靈得全安南人覬
金十三挺道却之其人已越境去呈之撫按事
聞有旨命安南人領金去以彰其廉秩滿陞王
府長史致仕歸淡泊一如寒士

馬中駮字蔚生少穎悟應童子試卽有聲登萬歷
癸丑進士授福建汀州府推官操同冰潔乙卯
分校閩闈得士攝郡邑篆事無巨細迎刃而
解報獄一鞠輒白蘊海氛方熾撫軍檄同福推
周順昌視師海上屢出奇制勝以功陞授學判

未任卒囊橐蕭然守及紳庶各捐贖以歸季子
從王歲貢生別有傳

張受孔字心一 中萬歷丙午亞魁生平獎掖後學
鄉達多出其門倡議決東湖水西流鑿縣學外
泮池以培地運授江西都昌令嘉惠膠庠留心
民瘼平徭役通商賈百廢釐舉民甚德之

邵有見字行可萬歷癸巳選貢丙午應天舉人授
江西南豐知縣畱意民瘼搏擊豪強秩滿陞王
府長史未任卒

李如鴻字秋賓萬歷丁酉選貢己酉應天舉人授

福建永安令永邑在羣山中叢林密菁山寇嘯聚滋爲民患艱於馴服又地多鐵冶每爐常聚數千百人類皆不逞之徒偶意迂即思鼓亂最稱難治鴻振飭有方寬猛互用使輸誠納款咸就約束陞山西忻州知州歷太原同知致仕孫元震有祖風年十八登順治戊子賢書爲嘉魚令亦多惠政

柴挺然字穎凡登天啓壬戌進士除行人甲子分校北闈擢吏部主事陞員外郎己卯典試河南拔熊緯等八十六人稱得士時魏璫權熾挺然

與惠世揚抗疏首劾闖黨嚙之崇正改元數條上封事如請復建文年號加楊左謚贈皆一時名疏并與中丞宋賢協疏嚴民解絹之苦會忌者擬轉外以母年九十七歲堅請終養歸年六十卒于家著有通鑑三筆山斗章以南草陰符經註行於世

宋賢字又希號雲樵性敏異偉丰儀登天啓壬戌進士授常熟令事繁吏猾一裁以法民有虞令難孰青天前召父後宋賢之謠以內艱歸補魏縣陞廣東道御史首彈逆黨數人又疏請官織

官解免嚴民解絹之苦壬申巡按湖廣拔廉懲
貪平反全活者九十七人入掌河南道大計黜
陟一切書儀峻拒不受晉太僕卿會山西巡撫
缺人當召對天子曰若非做河南道不受書儀
者耶遂命往山西時劇寇交訐賢增陴濬隍蓄
糧置砲帥總兵猛如虎擒賊首過山龍番天鵝
等辛未督師勤王以勞瘁病目陳情乞歸加兵
部侍郎予告癸未婺州土寇竊發賢與郡守加
葺雉堞設法勸禦民賴安堵

國初以原官徵不就失明不預外事逾歲卒年七

十六所著有西臺奏疏左傳撮要地理定宗

黃要旨等書行世

施王政字惺寰幼敦行誼克萬歷乙卯貢授常熟

丞清慎自矢陞彭澤令循良稱最擢永平府通

判時羽書旁午勞瘁成疾乞歸居鄉恂恂閭里

欽之膺賓筵者再壽八十一弟王惠字澤寰由

太學生授桃源丞陞惠州衛經歷隨勦九蓮山

寇有功遷江西都司斷事轉四川都司經歷甫

任卒子瑄徒步七千里負骸以歸

陳熙廷字君穆登天啓辛酉鄉試由太平教諭陞

廣東連山令連爲古廣德區猺獞雜處前令以
勦猺起釁兵連四載廷甫下車遂入巢招撫諭
以禍福猺蠻悉平尙民虞三陽等謀爲亂擒獲
有功制撫交薦其才遷廣西象州知州未任卒
子元錫元銘康熙丙辰己未歲貢從姪泰和順
治戊子舉人授無錫令孫宗洙康熙甲子舉人
宗泗另有傳

張立中字躍如以拔貢由天啓辛酉舉人壬戌會
試副榜初署上虞教諭啓迪有方士多造就陞
汀西萍鄉令萍糧多包侵弊中力爲釐剔積逋

以清艱歸卒所著有麟經正言行於世

朱國杞字炳垣賦性狷介以祖承軍籍刻志讀書
遂以能文顯膺天啓丙寅歲貢授嘉善學訓特
薦擢貴州黎平推官陞廣西思恩同知有異蹟
崇正間賜璽旌之後解任歸卒年八十二

國朝

夏日昌字德旋崇正己卯舉人庚辰會試副榜康
熙甲辰除廣東海康令時海界流民失業羣聚
焚劫昌親詣賊巢招撫渠魁楊二楊三等數百
人給種墾荒境賴以寧丙午入闈分理疾卒邑

民祭送如植萊公竹焉

馬揚明字對野從謙子也克順治五年恩貢授江南武進令武邑訟繁糧逋吏胥猾法揚明一清其弊廉明強幹媲美前令馬嘉植故民有大馬神君小馬神君之謠但才高氣傲爲上官所忌初挂彈章邑民相率罷市叩閭籲留事未雪卒于道時論惜之

解士錦字晝生登順治己丑進士授陝西漳縣令邑經殘破士錦招流亡勸開墾民賴安集改令豐城地衝役繁兼多水患士錦均徭減耗堅築隄圩疏引灌溉豐民利賴焉癸卯分校鄉試

得人考滿奏最陞行人司行人尋假歸家居嘗鬻產以賑鄉黨捐貲以周寒士年八十卒豐人思之祀名宦祠

詹惟聖字乃庸號尼菴登順治壬辰進士除山東德平令縣故多盜下車立首坐法盜遂屏息甲午分校鄉試後改補湖廣江華令時進勦西山疲於輸挽聖量民力權緩急役竣而民不擾會寧遠令以徵調致變臺使檄聖兼攝之開誠勸諭民感更生奏最擢刑部主事遷員外郎主江

南壬子鄉試會狀彭定求其所得士也轉戶部
郎中陞按察僉事視學江西振拔孤寒號稱得
士事竣歸里遭疾終於家先令德平遺愛不忘
士民請入名宦聖生平友愛事兄如師撫姪如
子睦隣贍族人稱其厚云

許學夔字面足中順治戊子副榜授雲南雲州同
知陞楚雄府通判時楚威初定誘掖董率振興
文學且蠻獠雜處經界混爭每致仇殺夔履畝
清丈著爲畫一之令民始便之擢宗人府經歷
卒于官

陳學聖字叔予由拔貢任江西南城縣佐時丁闕
逆跳梁効力行間以功擢新城縣尹捐贖難民
請免通賦歷攝南豐瑞州府事咸有惠政士民
懷之以內艱歸哀慟而卒所著有登臨寄嘯詩
集行于世

蔣鳴梧字從雲膺順治選貢授山西汾西知縣考
滿行取陞山西道監察御史敢言直諫無所迴
撓及巡視長蘆鹽政差滿復任卒於官生平善
蹟澤及鄉里如壬戌浙省水災奏除冊沒田
地設法賑濟併請禁在嚴採買柴炭以明末加

派遠餉一項確查浙省府縣實數擬將入

告未及舉行而卒郡人惜之子徵猷以奏各歷任至

辰州知府孫洪烈任湘陰知縣亦克繼志云

張允美字如玉文品高雅持躬嚴肅由康熙庚子

舉人授直隸清河令居官清介有王生事懸命

案暮夜餽千金立命却之仍白其事士民咸頌

其清而不刻蒞任七載囊橐蕭然年七十六告

休無力歸里孫璿隲厚增迎之乃歸屢與賓遊

卒年八十六歲

馬天選字閑上登康熙癸丑進士初授內閣撰文

中書陞楚雄府同知攝篆郡邑並著循聲守節

本省鄉試同考尋陞武昌郡守未任卒賊姿明

敏兼精數學著有耐寒堂詩文行於世

王齡昌字敬延康熙丙午亞魁癸丑進士由中書

任詹事府司經局正字再陞太子洗馬卒於官

生平寡言笑慎交遊處已待人不可為虛偽與弟

基昌友愛終身不渝鄉黨稱之

詹嗣祿字廉夫學道惟聖孫也登康熙癸未進士

歷陞戶部郎中使閩審理科場弊事屏絕一切

持法平允在途陞禮科給事中為遂寧張鵬翮

所推重癸巳分校會試尋陞工科掌印給事中
凡所建言俱獲

俞旨年五十卒祿八歲失怙母夏氏孀居有卓識其
家居救荒卹貧一切善舉悉稟母訓行之夏躬
膺封典人皆以爲獲報云

張雲鵬字文韓登康熙乙酉鄉薦授陝西延川令
清廉愛民兼攝清澗篆時有丈田加稅招商墾
課二事力爭罷之以才能調任富平軍需旁午
歲復大祲鵬以官碾易民碾餘米給民又倡捐
煮賑殷戶踴躍全活甚衆尋以疾卒囊橐蕭然

民甚思之

宋楠字丹林登雍正庚戌進士癸丑補朝考選廉
常授檢討丙辰丁巳分校禮闈尋陞右春坊轉
左春坊左贊善平生礪廉隅敦行誼詩古文詞
樸茂典雅卓然有聲任史館纂脩官綱目編年
成於一手凡所陳

奏無切時要不爲虛言以父年八旬乞歸終養竟
先父卒未展所抱士論惜之

理學

自古爲儒未有以理學名也周程而後始有以

理學名儒者所以別於訓詁章句之學也建邑名賢叠起並有薪傳用是一準宋史志理學

宋喻樛字子才少慕伊洛之學受業楊龜山性穎悟

博通經史嘗據一巨石校書因號硯石登建炎

二年進士第時趙忠簡公崇尙洛學薦除正字

告詞有曰頃窮西洛之淵源遂見古人之大體

雖爲衆所嫉而忠簡知之益深累官工部員外

郎知蘄州孝宗卽位提舉浙東常平以治績聞

擢爲人質直練達時務尤善藻鑑嘗言沈晦張

九成當進士第一後果然有二女富人交請婚

不許及見汪應辰張孝祥曰佳壻也遂以妻之

所著有中庸大學論語解及玉泉語錄行於世

寶佑甲寅知州季鏞繪像於學宮祀之

趙彥肅字子欽天資孝友畱心聖賢之學窮理盡

性弗深造自得弗措也登乾道二年進士初隱

居不仕宰臣周必大薦之孝廟彥肅益以近名

爲嫌仕止寧海軍節度推官所著有易說及廣

學雜辨士冠士婚饋食圖行於世朱晦菴觀其

書嘆曰近世未有如此看文字者學者稱爲復

齋先生嘉定己卯知州鄭之梯卽祥符寺遺址

建堂祀之命學官春秋致祭寶佑甲寅知州李
鏞復繪像於學宮

明徐鳴陽字子岐端介醇謹萬歷癸酉舉應天鄉試
除邱縣令誠心質行愛民如子公暇即進諸生
課藝問難以不阿時好改易州學正尋擢倅潮
州府半載投牒歸合郡額畱不得居鄉十餘年
清介不殊寒索引掖後進先敦行誼今邱縣有
崇德祠潮有懷仁碑生平著述有詩經折衷論
俗俚言齊民簡編脩身要語行於世

國朝

陳孔雲字尼光受業於張焯與焯子雲鶚友善博
極羣書制義唯讀二十七篇小試輒冠軍屢困
場屋遂潛心理學於經書各有剝解不死成說
而尤精於易謂易文字字皆象卦取二體二互
別立象圖闡異歸同故著輒奇中學使何世璠
賞之選克拔貢擬代爲授梓辭以未成書而止
同邑應德廣請其書讀之辯論反覆喟然曰吾
之不肯就君猶君之不我就也業三十年於此
易稿十七次矣然謂易主剛柔不道陰陽此言
誠然試爲君改之甫及脫稿而卒時年七十有

儒林

士以通古今兼文行謂之儒而漢書列仙之流
道謂之儒則儒之名小矣哉若乃橫經著錄重
席解頤不徒繡其鞶帨烏得不以儒當之志儒
林

宋方萬里字子萬幼失怙伯兄携之遊吳因家焉由
嘉定四年進士教授江陰軍儲義廩置小學謹
禮儀紹定五年以朝奉郎知江陰軍累遷太常
寺簿正贈奉政大夫萬里問學履行遠近敬之

趙汝述守平江遇之甚至汝述卒賓客皆散去
萬里獨護喪歸時人義之兄賜履嘉泰二年進
士授永嘉簿子洪嘉熙二年進士洪子槐景定
三年進士

明郎勝字汝彬僉事慶之從子也登正統七年進士
授行人司行人遷廣東道監察御史克振風紀
見稱於時景泰間奉勅清理南畿戎政明燭幽
隱宿弊悉除天順間陞福建按察司副使巡歷
郡邑激揚有聲成化己丑致仕勝學有源委尤
長於易歸里爲後進師表者二十餘年宏治四

年卒壽八十四

宋澄字源潔性清介除夕偶拾遺金立候失者還之成化癸卯舉人授高淳知縣有水蘖聲以製補龍陽改永定所至誠求民瘼多實心惠政年六十遂乞休講學於鄉從遊甚衆學者稱爲性齋先生與賓筵者三十年年九十六卒中丞其曾孫也

俞廷貴字天爵少孤力學領宏治壬子貢授平陰訓導平陰經學無傳貴盡以所業授之嗣是科名蔚起歷九載考最超擢伊府紀善教世子有功陞審理以內艱歸杜門課子長藝次稷咸登進士累受封典九與賓筵人方之燕山云壽八十六

王秉中字端本世以清白相傳中正德庚午鄉試第五設教鄉閭四方學者雲集賦性端直寡言笑見者咸欽其有德有量平生絕意干謁卒之日貧無以爲歛知府張元電率僚屬助購推官王朝雍志其墓

柳本泰字士亨領嘉靖乙酉鄉薦入太學師事呂涇野聞主敬窮理之學授上高知縣時邑中有

大俠素爲民害以計除之良善始安而俠黨以
量田起謗遂致政歸行李蕭然居鄉敦睦建
祠立宗約有古君子風年八十二卒所著詩
藏於家

戴震亨字元吉賦性峭直舉隆慶丁卯鄉試初
彭澤論大振教鐸鄰邑人士多師之壬午四川
同考得人尤多尋轉永新令以入計便道歸省
見垂白在堂遂不復赴杜門侍養不謁公府至
民間利病盡言無隱年七十卒著有詩韻指南
侶陶寄言崇善約編風世紀畧等集

馬致通字叔遠博學好古常積書千卷熟悉典故
以貢授金谿丞條上治賦清軍四事當道知其
才多所委重築城垣脩邑志竒績居多尋投牒
歸居鄉尤多義譽學者稱爲秋溪先生

張世揚字振之幼負竒質補弟子員屢試輒首倡
議請復兩湖遷邑校以新文運及貢授萊蕪訓
盡捐三年積俸置田以膳士之貧者詳載齊青
郡志擢興安諭興邑新設鼓舞振作士皆向風
會歲大祲令不爲賑民闕於市當道移檄世揚
撫賑乃大發倉廩民藉以生令因忌之卽拂袖

歸居家敦孝友執信義望重鄉里焉卒年七十
俞宰字幼唐少篤志力學與蔡公應龍以理學相
琢磨克萬歷丁巳貢由平陽訓導歷陞建寧府
教授喟然曰吾得至朱子教化之邦於願足矣
遊武彞山登祠拜像與諸生發明正心誠意之
旨人咸興起告歸林泉與賓筵者五年八十六
卒

國朝

王納表號乾所事親至孝性穎悟博極羣書尤潛
心理學嘗作箴曰福澤是一時人品是千古豈
可洩忍依回誤君國之大事壽考是一時學問
是千古豈可蹉跎悠忽昧性命之大關日與
徒發明性命宗旨著有四書周易訓要旁及醫
方地理數學諸解順治四年克貢不求聞達兩
舉賓筵年八十三易簣日猶講牛山之木章諄
諄以存夜氣收放心為訓其學力堅定如此子
家泰邑庠生立身行己無愧其父年五十餘值
父母喪哀泣同孺子慕力學精進不倦年七十
三兩獎優行再秩賓筵孫齡昌基昌別有傳
張雲鶚字次升為諸生時與同邑陳孔雲淳安方

蔡如各以問學相廣益登康熙丙戌進士因親
老不赴選郡守吳昌祚延爲書院掌教都人士
多往請業其論文如將兵隨地殊形而確有不
可易之節制說理則言必存物皆可見諸躬行
而義無滲漏諸所造就皆成名下士及親卒
澄城令以徵科不及考罷職士民籲留節使
有後命鶚乃堅辭而歸卒後著作散逸惜未有
成書焉

宋溱字唐州一字溲鴻幼聰穎語卽驚人及長博
極羣書長於詩賦工書畫求者無虛日中康熙
己卯鄉試受知於溧水史公夔覺羅滿公保後
清總制靳國招之往適臺灣告警偕之廈門出
奇制勝大半出其運籌平生敦孝友睦宗族喪
偶不再娶人尤義之

謝璣字符蒼康熙癸巳恩貢天性純孝母孀居澗
清備至及歿與父同幘繪像朝夕展拜如平生
終身不衰設帳談經門下多知名士老年好學
手不釋卷所著有四書備參易經備參若干卷
兩與賓筵年八十五卒

文苑

昔之序文苑者曰學者如牛毛成者如麟角然則文學之士亦不易言矣其或才華清綺或辭義精純各擅所長均之志在立言也志文苑宋吳儔字子友幼穎悟讀書十行俱下熙寧初中賢良方正直言極諫科和平門外其讀書樓雙在焉

明宋應奎字竹坡博通經史尤長於詩克嘉靖丙申歲貢任湖廣漢陽教諭首勵諸生以德行次及文藝尤惜貧士常割俸予之士荷甄陶者甚衆告歸士子勒石志行入祀名宦以孫賢貴贈如

其官

張寅字敬齋文淵裔也積學贍文爲邑儒宿由萬歷恩貢授成安教諭道義身型一時人士宗之子五人長孫大護克紹祖風護子允美登賢書別有傳

柴時暢字盈岡文章行誼爲一時師範克萬歷丁未貢高尙林泉啓悟後學擔笈從遊甚衆少食貧而不諂後子貴而不驕檢躬以謙治家以儉郡邑咸相尊禮屢與賓筵年八十一以子挺然貴贈如其官

馬如雲字龍田致通子也由太學生授江西上饒
丞邑界浙閩地廣民稠乃嚴保甲編里伍民安
盜息境內肅然秩滿陞鎮沅經歷以季子中駮
貴贈如其官

俞寰字位齋方伯夔之孫也與兄宸等俱以文行
名寰由太學生授湖廣長沙丞清慎敏練著縣
篆時有埋符掩鏡事蠱害多人事發夜饋千金
立麾去卒寘之法尋忤上官意挂劓歸里卒年
八十子華然性介直有父風

馮從謙字受卿與弟從謙以才名顯謙尤廣稽博
覽文章詩賦冠絕一時克天啓丁卯貢授江南
儀徵丞清介自持儀令重之凡興革事宜委任
專理以艱歸補廣東順德丞終於任子揚明別
有傳

俞有詔字聘吾質性醇謹克萬歷壬子貢授麗水
訓導陞湖廣公安教諭尋署石首監利二邑篆
政治廉敏民尸祝之陞楚府紀善致仕歸設館
授徒從遊者屢滿戶外屢薦賓筵壽七十五卒
祀鄉賢配洪氏壽九十七子熙績敦厚有父風
孫其藩邑廩生文行並懋克世其家

馬如電字晦吾萬歷己酉歲貢性倜儻博覽古籍
爲文千言立就年七十五猶手繕程朱語錄及
經史古文日凡十數則毫而好學誠僅見也長
子中騷有善行孫從恒別有傳

俞炳然字幼峯少承家學試輒冠軍尤長於詩詞
知府呂昌期聘脩府志一人獨肩其事文理燦
然子奎璧壁三人有聲於庠

沈三畏字懌予克萬歷己未貢任餘杭訓導制行
端方議論慷慨常聚書千卷手自編定第三聘
字覺如克天啓甲子貢任同安訓導博學多才

學使按臨適文昌閣成上賦一篇大加嘆賞

陞塩山令有循聲聘子呂順治戊戌貢畏子弼
康熙中恩貢生孫國祥歲貢生

王文燦字涵初爲文峭拔學使鄒廷光奇之列高
等次即其兄文煌於是同餽於庠崇正己未庚
申同克歲貢燦以葩經授生徒多所發明從遊
甚衆孫申錫以邑廩生與脩縣志後膺歲薦

徐允升字景明侍郎懷魯孫也克敦孝友親老兄
瞽竭力奉養家貧缺書手自抄錄戊午鄉試本
房以掄元不果寘之乙榜戊辰選貢授廣東臨

高縣丞尋卒妻姚氏暨妾陳氏茹荼守節撫族
孫爲嗣學博邵嘉有雙節傳

王相之字如四性醇雅美丰儀博學能文崇正乙
亥拔貢授南康令甫浹月卽掛冠歸松菊自怡
有五柳之風焉

國朝

柴時衍字君碩博洽多聞曾編孔聖年譜朱子年
譜彙爲一書人士有典故相叩者無不立應克
順治十八年貢年已七十餘家居屢空晏如也
及卒士林懼之

王應電字君闇才雄資敏至性過人母得羸疾時
方童年割股和藥以進母病隨愈長兄早世撫
猶子如己子克順治己丑貢任湯谿蘭谿兩邑
教諭樂育循循士多造就秩滿未陞卒

詹惟祥字逸庸天性英敏與仲惟聖季惟賢俱長
於戴禮後以雙親年邁絕意仕進膺甲申選貢
生平練達時務凡郡邑利弊鑿鑿敷陳人推一
方祭酒年六十八薦與賓筵子麟禧聰穎有父
風素有聲庠序亦膺歲貢考授中書未仕卒

俞雍字小邵性仁慈樂施予嘗捐脯金掩荒郊枯

豁自顧囊空弗恤也克順治戊戌歲貢任平陽
 訓導兵燹之餘多方啓迪諸生皆喜得師所作
 詩文筆力宏暢書法尤嫵媚尋卒於官子贊皇
 郡貢生克承家學善鍾王體郡守梁聘脩府志
 父子同任其事

馬從王字春卿中隸季子也年八歲父卒於閩
 踊過禮卽奮志讀書秉性狷介弗與晏遊與人
 論古必反覆辨難有質經史疑義者卽從架間
 抽軸以示序次不爽尤熟歷代典故郡守梁聘
 脩府志考訂精詳克康熙十二年貢廷試歸而

卒

三畏純字亦文性至孝父病衣不解帶者五十餘
 日撫愛幼弟終始不倦教授生徒以敦行立品
 爲先尤潛心理學易箒時自謂聖賢難免此日
 幸從來未壞此心未及歲薦士林惜之子嘉忠
 康熙壬子選貢任武義教諭卓有父風
 宋鈺字式其中丞賢孫也家教素嚴衣冠必肅兄
 錦任江蘇理問虧帑二千金卒後追比鈺不忍
 姪受辱請代完楚膺康熙壬子選貢授東陽司
 訓蒞任後捐建學署脩復祭器五十餘事振興

文教備盡厥職子五洽之澧澹並有傳錄以孫

楠 贈翰林院庶常

張烜字天佐君美仲子也天性孝友澹于名利念

父死倉卒逢忌日必素衣冠潔齋視事愀然終

日危坐偕兩幼弟同居至老無間言授徒數十

年負笈接踵教人先德行而後文章嘗反蔡澤

之言曰富貴不可求壽則吾所自有耳膺貢後

兩與賓筵年八十六卒長子雲鳳卓犖有至性

年三十喪偶以有子不更娶次雲鵬雲鸚別有

傳

陳宗泗字道源康熙戊寅拔貢乙酉登鄉薦授

烏學諭振興文教課士有方府縣推重之薦卓

送試未赴而卒

夏繩祖字其武郡增生自幼端凝慎言語寡交遊

孝友循循非禮不履作文樸實講理不趨時尚

造就後學甚多而屢困場屋對生徒如大賓盛

暑未常露體兩薦賓筵固辭不赴有古君子風

焉

趙用礪字金友家世業儒祖昌祚父晟俱卓有文

行礪承家學博習通典考訂詳明凡有問難無

不立應授徒數十年成就後學手輯家譜叅考
儀制所著詩古文甚富曆雍正元年選貢授職
州判未仕卒

陳禮字在魯邑廩生沉潛好學手不釋卷教授生
徒成就甚衆如宋楠宋載皆出其門所著有性
理要說見山園四書會解藏於家

錢鏞字赤華性孝友慎言行博通經史熟習典故
由雍正丙午歲貢授浦江學訓歷任四載謝病
家居勤學至老不倦年八十一卒

隱逸

易稱高尚孔論逸民三代而下嚴陵其首著
建故富春舊地誠高士煙霞之宅也激清風於
寰宇存徵尚於千秋士各有志繫豈無人志隱
逸

唐許法稜字道冲少有高名志尚肥遯有以法稜名
聞於朝者代宗命有司束帛聘之力辭不就
明蔡良士字石樓西山先生後也博通經籍尤精數
學新安莊慧安薦於周王以幣迎之遂遊大梁
遇異人傳還丹之術遂精脩養卒年九十七著
有儒本編一原編子應龍貴贈如其官

陳應中字太初號崑峯讀書不求聞達嘗大寒至
省過書肆遇古籍脫絮衣以市忍凍而歸嘗
輯汲冢路史等書爲通鑑彙編皆上古奇聞
蹟正史所未載壽昌令偶寓其家閱所著書
加歎服壽以事繫獄非其罪也令進其書於
守守立出之卒年七十崇正七年知縣陳訓臣
表其閭曰聖世逸儒

國朝

唐培字天棗邑庠生家貧好學凡天文風角奇門
六壬孫吳等書無不研究時值山寇竊發培

柵保鄉里寇不敢逼康熙十三年制府李之芳
坐鎮衢郡因本府薦延入幕運籌輒中制府器
之以不願就職辭歸邑人馬尺選爲之傳曰才
高性善不忍目覩兵刑安若家食以享遐齡誠
寶錄也

流寓

曹滯周南昔人所歎他如王粲俄人梁鴻貧庶
賢者所止自古爲昭矣志流寓

漢嚴光字子陵一名遵會稽餘姚人少有高名梅福
妻以女光武徵時常與子陵同學及卽位乃

令以物色訪之後齊國上言有一男子披羊裘釣澤中帝疑是光乃備安車元纁遣使聘之三反而後至舍於北軍車駕即日幸其館光卧不起帝即其卧所撫光腹曰咄咄子陵不可相助為理耶光不應良久張目熟視曰昔唐堯著德巢父洗耳士固有志何至相迫乎帝曰子陵我竟不能下汝耶於是升輿嘆息而去復引光入論道舊故相對累日帝從容問光曰朕何如昔時對曰陛下差增於往因其仰卧光以足加帝腹上明日太史奏客星犯帝座甚急帝笑曰朕故人嚴子陵其卧耳除諫議大夫不屈乃隱于富春山後人名其釣處為嚴陵瀨建武十七年復徵不至詔八十終于家帝傷惜之詔下郡縣賜錢百萬穀千斛子陵本姓莊今系派在建桐二邑者遂為嚴氏云

宋豐稷字相之明州人徽宗朝為御史中丞首論蔡京姦狀京坐貶及京復相脩故怨稷安置睦州俞稠河間人仕吳越太傅建隆八年王俶歸宋稠輔以行太祖命稠為睦州刺史因家于郡之分陽數傳至誠一宋南渡為國子丞有異績著南

疇集行於世尋以元兵至臨安避居郡城遂世其家詳見方拱辰銘

元應光輔台州仙居人至元間以進士任建德路閑糧官至正八年方國珍肇亂台郡因挈家卜居縣西九都山中明初幼子孟陽入郡庠孫達膺洪武二十八年選貢明年授福建將樂令調任沁源令卒遂世家焉

明陳均德字得旻吳興人元末由明經任建德路教授時元運告終東吳爲張士誠竊據遂卜居焉子通以人材薦舉任蘇州府推官陞太僕寺丞贈父如其官今成巨族云

國朝

武得榮河南尉氏縣人隨父華宇從戎至嚴康熙十三年壽昌山賊竊發隨副將鮑虎進勦先騎示民遠避請招迷擄婦女還其家并請釋脅從者壽民德之復家郡城籍入壽昌祀鄉賢其官跡詳見壽昌志中

忠烈

投生殉節自古稱難殞身王事禮加二等蓋大義所存一死重於泰山而纂言有體千秋書其

碧血身歿名彰其烈士之謂與志忠烈

宋劉晏初入遼舉進士爲尙書郎宣和中率衆數百來歸授通直郎金人犯京師以晏總遼東兵號赤心隊建炎初從劉正彥擊賊淮西及金人犯建康杜克真潰羣寇犯常州晏出奇破之後追擊賊戚方於宣城爲賊所害贈龍圖閣待制立廟死所官其子四人

朱夢說字巖隱徽宗時以布衣獻直言謂入仕之源不清不惡之務太繁宦寺之權太盛語甚切至後登進士高宗時累遷秦州軍事推官岳飛聞其賢辟爲幹辦公事時辛炳爲御史中丞屢言宰執大臣之罪而罷黜之夢說以時尙禽色之樂而忘二聖播遷貽書責其不諫炳惶恐袖夢說書上殿奏陳高宗不說乃諭飛罷之飛厚贖而謝遣之尋炳亦外調


明張文淵一名海海洪武初編伍營州尋調開平永樂十七年從興安伯徐亨備邊俘於沙漠北主奇之欲妻以女懇辭與之官不受因入貢至京奏密情十四事朝廷嘉之頒旨開豁原籍軍三名匠二名復其家次年得古璽欲南遁追騎甚

迫乃模篆於裙幅間投璽於水至則真跡爛然
馳獻宣皇召對便殿賜五品服色酒飯寶鈔官
錦衣衛千戶子孫世免差徭懇乞歸田文淵在
沙漠一十五年時比之蘇武年八十餘孫健亦
以行誼著

張瑛字彥華自幼剛方尤勤於學領永樂十二年
鄉薦授刑部主事遷員外知建寧府時閩賊鄧
茂七搆亂其黨林紹得葉宗雷陳保等衆至數
千蔓延至建寧屠毒日甚瑛募壯士圍義兵擊
走之以功陞福建左參政仍掌府事後餘黨復

熾寇逼城下瑛與弟敬率兵禦之乘勝逐北
破戰沒瑛爲伏兵所獲迫之降瑛大罵不屈死
之事聞贈嘉議大夫福建按察使遣官諭祭官
其子熙爲羅田主簿宏治四年建寧知府劉瑛
具奏建祠於城南歲時享之建安雷燮有張按
察祠志

張日新字心白爲人嚴毅倜儻崇正五年歲貢授
宿松訓導陞齊東教諭日與諸生講藝習騎時
渠寇安守夏者倡亂新招之降遂與同守東邑
崇正十三年齊東被圍新守北門率其二子光



尹光裔百計防禦城陷被執同子光裔及安守
夏死焉妻方氏聞訃奔死所有欲犯之者氏曰
吾一門忠烈豈容鼠輩汚我耶持匕首自刎時
謂臣死忠妻死節子死孝以三烈目之

張連曜字景明郡廩生爲人剛方尙節中丞宋賢
薦曜賢良方正授四川巴州同知崇正十四年
流賊張獻忠屠壽川右圍巴城踰月曜督兵民
晝夜死守知城將陷自製一寢衣繪忠臣二字
并製一聯護於脛謂其下曰我死爾以此覓我
屍耳城陷被執獻忠欲降之大罵不屈賊磔殺

之後賊退果以衣得屍漸撫董表云以州佐
擁孤城九死不移以隻身而當強寇寸裂自甘
建額曰睢陽比烈事聞追贈奉訓大夫

邵子灼字季可崇正四年歲貢授永嘉訓導讀書
益勵已卯中鄉試副榜例復得貢巡按王範題
請擢河南郟縣知縣劇賊張獻忠等肆毒中州
環攻郟縣灼督兵死守度勢不能支整衣冠懷
印綬曰此人臣致身日也賊至不爲屈蹈刃而
死士民哀之立祠以祀

王元封中崇正甲戌武進士授湖廣大圍山守備

素負膽畧時楚中流寇正盛屢立戰功賊犯境
封單騎入賊寨擒殺數十人時賊方造飯見其
後無援兵以湯糜潑之馬仆猶步戰殺數人而
死

張其勲字君美萍鄉令立中長子崇正癸未歲貢
甲申之變勲驚聞悵恨每泣下其妻以未食祿
為解勲曰吾家世受國恩義同休戚三十年廩
粟亦祿也人誰無死特患死不得所耳復請少
待勲首肯已而攜家入山後逐自經其勲居家
孝友內行淳備待人接物造次必依於禮鄉黨

宗族莫不愛重雍正元年浙江提督學政何世
堪據闔縣公呈請入鄉賢檄准崇祀併作文題
於傳後府縣各官俱有贊跋表揚節烈以志不
朽云

孝友

至性所流智愚罔異極其所至可以格天是以
誠達泉魚感通林木音人所紀豈以云誣迄乎
輓近教薄風漓天懷漸遠勲得而稱焉苟有其
人余急進之志孝友

唐何起門事親至孝父死廬墓屢有異徵太歷中刺

史蕭定以狀聞奉詔旌表其門詳載新唐書孝友傳其後裔有名惠者宋嘉定間由明經爲金華學諭名大忠者紹定初由貢舉爲國子助教宋徐明紹興五年母病明割肝療之母卽愈有司以聞建坊旌表

何崇源景定四年母病割右股肉煮粥飼母卽愈咸淳五年母再病復割肉以進隨愈

陳師清咸淳五年母病危篤就右脅取肝煮粥以進母病愈

蔣定德咸淳六年母病篤割右股煮粥以進母愈

徐大發咸淳六年母病危發與其姊五娘各割左股肉煮粥以進母病卽愈

明徐楚脩郡志附論曰孔子曰孝子之事親也居則致其敬養則致其樂病則致其憂喪則致其哀祭則致其嚴程叔子曰病卧於床委之庸醫比之不慈不孝事親者不可不知醫未聞割股割肝療親者之爲孝也夫割股猶傷其外割肝則傷心腹矣萬一身死親何賴焉甚矣世俗之詭異可駭也前志載建邑徐明何崇源諸人割肝療母之事徒矜一時之情切而不知自陷于隕身滅性之地君子何取焉然以是而旌異蠲役人爭效之吾恐風俗之好異盜名爲不可止已姑存其舊以俟後之秉筆君子評焉按現行則例割肝割股不准旌表

明王思正事親最孝明興有司旌其賢舉爲鄉老賚册至京敷對明切太祖嘉之授溧水主簿以母

疾辭歸終養遂允所請侍郎浚其曾孫也

何秉敬起門後也昆季四人相友善父道崇治家

嚴肅訓諸子曰吾家孝義著聞自高祖希紹及

今五世矣若等勿替家聲永敬敬諾更相雍睦

一門六百餘指同居九世成化元年知府張永

以狀聞詔旌其門

蔡廷琛父病篤焚禱請代卽愈母病日百計醫

復明人皆異之成化間知府張永奏聞旌表

徐璠居父喪盡禮母病牀家被火乃衝火負母出

母生而璠則患燎死矣遺妻宋氏安貧守志迭

蒙院道獎異可謂夫婦孝節

姜宗齊天性至孝遇父病篤割股救療以生數年

後父故家貧如洗奉寡母撫幼弟不憚勞瘁母

病則焚香祝以身代湯藥必親嘗跪送以得母

歡心迨母終以香木刻二親容事之如生年九

十未嘗少懈輿論咸稱院道累加旌獎

馬軫字南屏兄弟五人軫最幼蚤皆嚴訓而仲兒

亦亡軫事母極孝母九十終居喪執禮內外稱

之撫仲兄三孤不殊已出督成甘學並有聲庠

序平生仗義急公如遷邑庠脩西湖藉以董理

捐橐不吝臺憲屢加旌獎

宋邦標孝友性篤父病割股和藥獲愈母病亦然時有神降於庭人謂至孝所感居喪蔬食三年起卧不離喪次兄死典衣以葬萬歷間直指謝廷傑給粟帛獎之

戴啓祥字警宏震亨子也由邑庠補國學生性至孝初父令永新歸日以詩酒自娛祥綜理內外不以塵事櫻父懷父舉庶子啓祐撫之備至及析產以豐者讓之父卒哀號幾斃以母在勉強飲食母年八十六卒撫棺慟曰兒一終母事卽

相隨地下矣抱病伏土執禮惟謹遂以哀毀嘔血而亡後子東旻成進士疏其事於朝命有司建坊旌表

國朝

楊鵬字奉岡少有至性父病割左股療之獲痊母病復割右股以進亦愈郡邑嘉其孝行申詳院司載入憲綱屢舉賓筵壽九十卒紳士作歌美之其子庠生天德彙輯成編顏曰永思錄

唐和羹字汝梅邑庠生性至孝康熙癸未父病求代不獲卒後廬墓三載戊子母卒復廬墓三載

時有遇虎不傷之異年三十一始娶生平篤於友愛言笑不苟雍正三年公舉孝行督學彭維新給銀獎賞

沈如日字錫華性至孝父病劇割左股和藥進之得愈後母病復割右股亦愈不欲人知雖大暑未嘗露體父母俱享遐齡隣人楊醫聞之邑令欲上其事涕泣固辭而止膺康熙庚戌歲貢子逢原乾隆元年歲貢任金華訓導贈如其官

吳文樸字青侯邑廩生家世孝友年十三父時夏卒晝夜悲號幾失明越四年母病侍疾經年柴

棚骨立及卒時祖一儒在堂恐傷其心晝則侍祖飲食必親夜則伏枕泣血祖微聞以大義曉之唯唯不敢出聲終喪如禮祖年八十六卒哀毀如喪父母復遵祖命建宗祠置祀田五十畝卒年五十六乾隆七年兩庠舉其孝行建坊旌表

何天爵有至性父母先逝事繼母以孝聞繼母病劇爵叩天割股和藥以進母隨愈後以壽終縣尹徐京哲旌之曰割股事親性稟良純克承祖德確據鄉評

吳文邁字越斯乾隆辛酉舉人父克庸蚤喪文邁年十三哀毀欲絕伯叔父勸止之曰母在爾毋過毀重傷母心從師肄業誦及怙恃句輒掩卷涕泣比長奉母不去左右母食乃食母減餐即不食或夜寢不適則起抑搔達旦不寐終身有孺慕色母年八旬卒哭泣之哀啜飲之節多至過禮既葬居廬不更衣不頽沐日進糜粥無異初喪大祥後柴柵骨立耳聾目眩鬚髮盡脫幾致滅性見者無不心惻卒年五十餘

卓行

士無貴賤苟心乎爲善於物必有所濟矧救災卹患歷有可稱者乎覽於斯也睦媪任卹之風猶然三代之隆矣志卓行

宋胡莊字吉卿推江淮總幹補將仕郎乾道乙酉桃源寇作莊畫計擒之境內肅清淳熙辛丑水旱相仍饑殍甚衆莊以己之山林縱人樵採民賴以生子從龍天錫皆有時名仲子夢龍登慶元五年進士

明馬景福器宇端方性篤友愛獨力起家貲產分推諸弟歲饑周恤鄉鄰有稱貸者久則取券焚之

以閭里艱於汲疏鑿純孝坊甘泉井方廣丈餘
覆以石欄井眼有六郡守萬觀旌曰德沛甘泉
孝廉何琮爲文紀其事屢舉寶蓮年八十四卒
子思義領景泰丙子鄉薦罹會場災殞於火特
贈進士

王景貴性慷慨好施予見義勇爲縣北胥村路當
孔道環以大溪往來病涉貴捐貲數千金建石
橋長十餘丈郡守李德恢爲文紀其事額曰胥
村義橋其他建安仁橋砌釣臺路鑿塘築堤多
利賴焉郡邑嘉之授以義官孫大年亦以賑粟

旌獎

仇文政五世同居天順間郡荒旱文政輸粟八百
斛奉勅旌其閭曰義門子綱成化間又輸粟五
百斛藩司行府立石萬歷四年其族孫鍊鉞二
人復輸粟二百五十石府請給冠帶榮其身

宋邦機字少坡性通敏少隨父應奎之漢陽任同
官竒其才以女妻焉會父卒隱居不求聞達尤
好施予如煮糜賑饑捐櫪掩骼善行不一人稱
爲長者且精書筭萬歷間丈量田畝闔邑以公
平推重清丈多出其手以子賢貴累贈通議大

夫

何子伊敦樸好義萬歷間督脩下沙勤勞克著舉
賓筵年八十嫡姪一麟年八十三一鳳岸生年
九十子一鸞年八十五鸞妻王氏康熙壬子壽
登百歲郡守梁表其門鸞子善德事親孝嘗母
年九十八忽患背疽痛不可忍不敢出聲以傷
母母心嘿禱神曰但得待母百歲卽減已筭可矣
既而果然德亦年逾七十間里稱爲一門人瑞
蔣試鰲字後峯幼孤事母以孝聞年十八過烏石
渡舟遭覆鰲於洪濤中若有挈之起者茹齋力

善同里洪子思通糧鬻女鰲代償遣嫁閩商林
颺廷挾貲千金過嚴病篤封識寄鰲鰲厚殮之
遣示其家越三年妻若子來取前銀封識如故
其他置渡砌橋善舉甚多年八十三兩舉賓筵
人稱爲蔣老佛御史鳴梧其嫡孫也

應文聘字賓我邑岸生年十歲父以事繫獄奮然
赴監司訟寃監司嘉嘆立出之比長父病封股
療之得愈親喪獨任不及昆弟生平手輯家譜
自叙年譜諄諄以忠厚二字爲家訓年七十七
卒

何尚賢字景吾以孝友聞繼母病刲股和藥以進
性好施周貧恤乏而排難解紛爲閭里所重課
子若孫家訓惟嚴以子士錦貴贈如其官

馬從恆字常卿生而敏慧八歲有神童之目年十
三補弟子員試輒冠軍赴甲子鄉試聞母喪從
步歸以不及視含歛觸柱幾斃事父尤善養
有姊適孫姓夫出亡迎歸膳養以成其節再赴
鄉闈有鄰女來窺者峻拒之其操行端方類此
教授生徒皆一時名宿以季子天選貴贈如其
官

俞得綬字金庭賦性端恪事繼母以孝聞尤敦於
宗族有貧不能葬者竭力經營聞者咸高其義
生平攻苦力學爲文卓有古風克崇正十二年
貢未仕卒

國朝

詹應夔字吾山先世遂陽宋狀元詹駉之裔幼失
怙恃追隨伯父曲盡孝養性慷慨重然諾寬厚
好施雅意墳典嘗手錄古史嘉言懿行集爲家
訓以課子孫高風逸韻人爭羨之以子惟聖貴
贈如其官

蔣子貢字少峯試鰲子也樂善好施克繼其父尤篤同氣兄子賓弟子寶貲故落割已產贖之初居東關地瀕溪行人買舟以濟乃捐已橐置義渡復買田以食駕者爲經久計遇溪水汎溢屍櫬隨流持錢立河濱僱人埋掩鄉鄰有鬻妻賣子及死不能殮者罄囊助給居家以課子讀書爲務以子鳴梧貴贈山西道監察御史卒祀鄉賢祠

宋維翰字虎祝中丞賢長子賦性寬厚膺甲申選貢初父歷任中外二十餘年慎持家政折節讀書所交皆名士歲荒賑米施粥周給族黨有麥舟風長子錦以貢任江蘇理問丁祖母艱歸卒季子鈺別有傳

詹開禧字子英性聖子也幼喪母哀慟如成人每語輒嗚咽事繼母如所生年十七補弟子員入文廟觀祭器殘缺捐金補置平生樂善好施出於天性以長子嗣祿貴贈如其官次嗣業聰穎善屬文卓有父風亦偕兄捐脩文廟以廩貢候選教職未仕卒

應尙友字如蘭生丁兵燹家貧棄學以服賈致洗

建德縣志 卷之八 人物
三
腆備極孝養父母俱登耄耄胞叔斗宿貧不自存
至欲薙染入山尙友苦諫以歸養之終身又族
叔全斌以其子弗類將致之死力解得免亦相
依以老及卒仍以遺業還其子兄嫂早亡撫姪
如己子姊適桐邑洪氏垂老貧獨迎歸撫其孫
至成立間習青島家言占多奇中每以此致譽
卒年七十有七子四長德華次德受歲貢生季
德厚邑增生以三子德廣貴膺封典

王開泰字曰載家世好義有至性幼失怙事祖母
及母至孝置祭田定祭儀凡族中冠婚喪祭有

不舉者糜不飲助水旱災祲捐穀賑糜恩及鄉
里歲饑民多盜木惟相戒勿入曰載山塲茶園
更指出數處予之其好善樂施甲於一邑屢與
賓筵以次子璵貴贈如其官長子璉字禹珍國
學生善承父志歲歉出粟以貸同姓踰歲有償
者弛其息不償亦不問也累世義舉至今弗替
王基昌字文起郡增生博古能文事親至孝兄齡
昌卒於官基昌徒步迎櫬京江相國有孝友真
儒之稱數困棘闈遂絕意進取晚善岐黃術活
人甚衆一切餽謝峻拒不受亦無德色郡守張

公芳邑令薛公景珏俱雅重之終年七十三歲
趙昂字雲駒邑庠生性孝友年三十喪偶或勸再
娶愀然曰吾妻迨事吾親先父母逝久矣且吾
王已有子何忍再娶生平澹泊自甘持躬狷介非
禮不履有隱德焉年七十六卒

馬天榮字爾星國學生幼貧失怙獨力成家後稍
裕念長兄貧給田十六畝與幼弟同居無間孝
事孀母壽登九十晚出所積四百金創立宗祠
以收族合食內行脩謹可風薄俗矣

吳瑜字美玉事親孝養服勞致疾未嘗言瘁同懷
及同祖兄弟三十人悉友愛無間有從祖乏嗣
養之沒齒喪葬皆身爲之主內戚張拱三狷介
寡合獨受其養二十年歿殮而殯之謂其子曰
吾百年後必葬之墓旁俾吾子孫歲時祭掃無
使餒而歲饑嘗出粟助賑又自爲糜以食同里
之饑者其他振貧恤孤多比類子謙誌初爲榮
澤令以百金爲父壽立遣封還命於榮邑買地
以贍貧窮卽一裘一葛詢係官物輒屏弗御以
子貴封如其官年六十有九祀鄉賢

列女

詩首關雎莫先陰教重名義嚴閨範彤管所紀
足徵 國家教化之隆閭閻風俗之美也志列

女

宋徐氏二烈女

二女長清次淳年皆及笄元兵下嚴州父師顏携之避於薛山父出而兵奄至清謂淳曰吾家世清白不可受汙辱遂相牽投崖死鄉人憐之立祠祀焉

元孝女王氏

至天間女父出耘舍旁為豹所噬曳之升山父大呼求脫女識父聲驚趨救以父所棄鋤擊豹殺之乃得生

明節婦孟氏

方師夔妻元末師夔為鄞縣小溪寨總檢卒於官孟年二十七上原德扶榷歸竭力營殯舉夫家之不能葬者七喪四十餘年操行貞潔洪武十年旌

節婦何氏

朱仍壽妻年二十八夫亡守志年八十終詔旌其門

節婦沈氏

徐宗賢妻年二十二夫死於水子十九歲三年旌

節婦余氏

梁文顯妻氏年十七歸文顯時顯為文顯論死弟文義亦故余年二十三並舉二女或立

或立

貞女何氏

何盈女起時後也

節婦陳氏

方倫妻年二十二倫卒於東氏孝養

節婦許氏

徐惟俊妻年二十四夫亡姑老

節婦繇氏

王伯誠妻年二十四夫亡守節終身孀後為福建長泰命

節婦仇氏

王延璽妻年十九夫亡遺孤大發節遇賊矢志守節教子成立年七十卒院司

累加旌表

節婦吳氏

仇紳妻年三十八夫亡矢志守節年九十二卒有司旌表

節婦邢氏媳王氏周氏

邢氏徐鍾妻年二十八夫亡堅志守節訓子行儀

大年既爾行獨繼卒行妻王氏年二十四妻周年三十二無嗣邢率二婦旦夕紡績共

苦時郝徽云昔姑類媳以終餘年今孀依婦以全晚節與誠可動鬼神志願永昭今古邢八十

十三卒周婦居四十餘年萬歷五年知府楊守仁上其事奉旨建坊

節婦張氏

唐良正妻年二十六夫死子幼舅姑年近良正向在淺土氏連舉三喪教子成立仲子繼補邑庠生年七十四終

孝 撫遺孤年八十二卒院司旌其貞節生員王文燿妻年二十二夫亡氏哭絕

節婦丁氏

王章妻夫亡獨守小樓代人紡績以

節婦馬氏

欲死以殉家人救之乃停棺內寢三年不離左右貧甚代人紡績以饒舅

姑年逾八十卒院司屢加旌獎

節婦徐氏

馬應祖妻初應祖學儒不成遊西粵值

捷以功授職將領亡何病死氏年二十三概歸勸幾絕以翁老子幼勉力供養後子慶豐以父

功叙錄

節婦陳氏

宋宰妻年二十五夫亡貧甚遺孤三歲

喪值歲歉兼遭隣火延燬饑寒迫切茹苦守節郡守旌曰苦節可嘉

節婦馬氏

宋邦棧妻年十八夫亡無子守節事姑以孝姑病禱以身代姑病即愈足不履

戶闕卧不解衣帶家無擔石紡績度日年七十五終天啓間屢加旌表

節婦謝氏 張德俊妻夫死遺孤六月誓死守節姑泣子喪明氏以舌舐之久之復明艱苦

備嘗教子成立年七十一終院司嘉獎

節婦湯氏 包應登妻年二十夫病篤封股以進夫死撫孤女課姪如已出年七十五卒府

縣加獎

節婦陳氏 馬中駁妻年二十四夫亡僅二幼女撫姪從龍為嗣苦節五十餘年壽七十六

節婦程氏 馬步雲妻年二十三夫亡遺腹子永鎮家徒四壁矢志撫孤卒年八十有二

節婦柴氏 馬從亨妻年二十三卒家貧無子撫幼女紡績自給卒年六十二

節婦王氏 俞熙志妻年二十五夫卒子襁褓復死家貧守節有諷以再適者欲引刀自殘

言者乃止卒年七十九

節婦何氏 馬從豐妻起門後裔也豐歿於水時氏年二十四家貧止一女與姒柴氏交相

刻苦年六十四終

節婦孫氏 趙鳴鸞妻年二十三夫故家貧守節撫子守邦為諸生知府給扁旌之卒年七

十七

節婦陳氏 馬逢晉妻年二十七夫故子國元生前踰月矢志撫孤堅貞弗渝卒年七十四

節婦錢氏 馬慶明妻年二十八夫卒無子矢志守節事姑以孝鄉里稱之

節婦張氏 何其龍繼妻齊東學諭日新女年二十二夫亡矢志守貞撫前妻子嘉珪游庠

食餼里族賢之

節婦宋氏 王兆昌妻年二十五夫亡家貧子幼矢志守貞年五十四終

節婦徐氏 唐伯宗妻年二十五夫亡矢志守節茹苦終身鄉里標之

節婦劉氏

唐伯安妻年二十二夫十守節堅貞不移鄉里稱之

節婦馬氏

陳所濟妻年二十九夫故矢志守節殫心課子長泰和登戊子賢書次用和邑

庠生有文行

節婦陳氏

王世秀妻年二十九夫亡守節子幼屢遭外侮獨力支持教子成立不墜家聲

問里賢之

節婦陳氏

施繼龍妻年二十三夫亡守節孝事舅姑撫孤成立卒年七十

烈婦方氏

張日新妻事載忠烈傳

烈婦高氏

吳士昌妾明末鄭芝龍敗兵回閩所至剽掠氏為兵所攫厲罵不屈兵脅以刃氏曰吾寧死耳決不汝從遂投塘下死越數日家人得其屍顏色如生或曰氏趙姓

國朝

節婦王氏

戴東暉妻年二十

四月十五日

風孝事舅姑殯葬盡

節婦何氏

張宏聖妻明末殘兵屯嚴向聖索餉聖奮不顧身號呼逐虎若有助之驅者遂得聖全屍以歸自是齋素終身撫鞠二子訓以義方長子敦遠傷父遭慘死獨守父櫬三年不移寸步母子節考閩邑上之學使給扁旌之氏卒年八十

節婦陳氏

戴茂葵妻崇正間葵父巡撫鄖陽被

姑年逾八旬雙目失明氏左右扶持孝養備兼事繼姑庶姑皆以孝稱家益落撫子玉給

績授經年七十卒康熙二十二年

節婦蔡氏

王景運妻夫為郡庠廩生早亡氏年二十八歲家貧守志撫子家相未冠遊庠

郡守梁浩然旌
其門卒年七十

節婦張氏 陳士煌妻年十九夫亡矢志守節立嗣
厚增為諸生年七十卒康熙四十五年
旌

節婦柴氏 張璘妻年二十三夫亡守節
撫子成立康熙四十八年旌

節婦施氏 監生馬銓邦妻年二十九夫亡守節
子岳生為貢生年六十九卒雍正四年
旌

節婦何氏 喻國勳妻年二十二夫亡勳兩弟相繼
亦卒氏孝養舅姑鞠遺孤兼撫二姪後
二子皆克成名二姪俱成
立至今同居雍正六年旌

節婦程氏 生員馬自鈺妻年二十二夫亡無子
立志守節年六十五卒雍正八年旌

節婦劉氏 監生楊殿庸妻年二十四夫亡無子
志守節孝事孀姑喪葬盡禮年七十
卒

雍正十年旌

節婦夏氏 陳光簡妻年二十七夫亡守節撫子
成立年七十九卒雍正十二年旌

節婦費氏 何嘉鼎妻年二十七夫亡守節
撫子成立康熙四十五年旌

節婦陳氏 董九霞妻年二十五夫亡守節撫子一
華成立年五十九卒于雍正十三年旌

節婦詹氏 貢生武元勳妻年十八婚甫十月夫亡
誓死守節孝養舅姑喪葬盡禮乾隆元
年旌年七十
十有三卒

節婦邵氏 洪兆寔妻年二十六夫亡無子守節
孝養孀姑年七十七卒乾隆元年旌

節婦孫氏 王遜妻年二十八夫亡守節撫子
成立年卒乾隆元年旌

節婦何氏 生員楊士魁妻年二十五夫亡守節撫
前妻子上達上迪俱為諸生乾隆元年
旌

節婦伊氏

生員吳克常妻年二十五夫亡于幼家貧守節翁一儒垂白在堂孝養勤瘁獲

享遐齡撫子蘇為諸生乾隆二年旌卒年四十一

節婦馬氏

饒以智妻年二十八夫亡守節撫子鼎聯成立乾隆二年旌現年八十一

節婦周氏

王季宣妻年二十九夫亡守節撫子昌年成立乾隆二年旌年七十三

節婦徐氏

生員許彬妻年二十七夫亡守節立嗣子元發為諸生乾隆二年旌年七十六

節婦施氏

生員宋兆鼎妻年二十九夫亡守節撫子密為諸生年五十一卒乾隆二年旌

節婦唐氏

子元燮遊庠乾隆三年旌年七十三

節婦童氏

蔡瑛妻年十九夫亡守節遺腹子既長又亡無子始終不渝年六十卒乾隆二年旌

節婦郭氏

施其懋妻年二十四夫亡守節撫子成立年七十二卒乾隆三年旌

節婦唐氏

吳效高妻年二十六夫亡守節撫子榮昌成立年四十三卒乾隆三年旌

節婦孫氏

馬天禧妻年二十七夫亡守節撫子無子年八十四卒乾隆四年旌

節婦陳氏

生員宋之漣妻年十九夫亡守節撫子蔡成名乾隆四年旌

節婦陳氏

徐佳賢妻年二十五夫亡守節撫子成立年八十八卒乾隆四年旌

節婦洪氏

邵世畧妻年二十夫歿於水子方周辟家貧守節舅姑憐欲嫁之氏堅不從撫

子可明成立乾隆五年旌卒年五十七

節婦蔡氏

王邦傑妻年十八夫亡守節遺腹子四歲又亡立者相為嗣纔周辟撫之成立

乾隆八年旌年五十一

節婦仇氏

汪君如妻年二十八夫亡守節撫子成立乾隆八年旌年六十八

節婦馬氏

施畧妻年二十七夫亡守節撫子必遜成立乾隆八年旌年五十九

節婦宋氏 黃國柱妻年二十六夫亡守節撫嗣子兆麟成立年五十八乾隆八年旌

節婦任氏 宋友仁妻年十九夫亡無子守節孝養孀姑嗣子家備先卒復撫孤孫振泰乾隆八年旌

隆八年旌年五十八

節婦蔡氏 王以相妻年二十一夫亡無子守節撫嗣子金飛成立乾隆九年旌年五十七


烈婦張氏 余啓榮妻年二十四有親宋某者常往來於家乾隆八年夏氏方浴於寢室宋

窺之侵以惡語氏大恚奔訴於姑遂自盡父訟之官抵宋於法有司上其事建坊旌表

節婦錢氏 王內聖妻年一十八夫亡守節撫子曾述爲諸生年五十一卒乾隆十年旌

節婦郭氏 吳光天妻年二十一夫亡守節撫子成立卒年五十四乾隆十五年旌

節婦黃氏 生員施純宗妻年五十五夫亡無嗣侍奉翁姑現年六十一 隆二十八年旌



建德縣志卷之八終

文化甲子

